

*LI BOUTE-PO-RIN ET L' FOUTEU D' DJINS.*

On p'tit fi d'Italyin qui s' plaît bin avou nos  
Vint d' douviè au viladje on bia salon d' cwèfure.  
Mins dès rèclames èt rin, c'èst l' minme twale à m' saurot !  
Si mèstî, i l' coneut, tot l' rèstant, i 'nn'a d' cure.  
Po-z-atirer l' pratique, bin mostrer qu'il èst là,  
Lès cis qu'èstint d'avant li, i l'z-i va fé dès figues :  
Li maurdi, i rèlît, po lî côper sès tch'vias,  
On' ome qu'è profiterè sins rin mète è l' chirlique.  
Li prumî qui fait l' saye, c'èst l' mârchand d' fleûrs do cwin ;  
« Qu'èst ç' qui dj' vos dwè ? – C'èst bon ! c'èst l' djoû qui dj' su di d'néye ! »  
I s' dote bin qu' ça s' va stinde come dèl paye au molin.  
Li lèd'mwin, pad'avant l'uch, chîs rôses su lès montéyes.  
Li deûzyinme dès chançârd, ç'a stî l' vî bolèdjî :  
« Fioz ça au pére dès pôces, c'èst po l' mâriadje di m' fèye ! »  
Il a stî tot sbaré quand ç'a stî po payî :  
« C'èst bon insi, vos di dj' ! Mès complumints por lèye !  
– C' è-st-avou grand plaîji qui d'mwin, po vos r'mêrci,  
L'ovrî qui fait l' toûrnéye vos-apwaterè one taute  
À fé glèter s' minton, one sipèsse taute au riz ;  
S'èle n'èst nin à vosse gout, nos l' discandjerans sins faute. »  
Saquants samwin.nes après, ça tchaît su l' député :  
« Vos n' mi d'voz rin du tout, di-st-i, r'plèyîz vosse boûsse !  
I s' fait qui tènawète, fé preûve di charité,  
Ça m'apwate do bouneûr come quand on gangne aus coûsses. »  
Quand il a douviè l'uch, li lèd'mwin au matin,  
Nosse cwèfèû, tot sbaré, n' comprend rin à l' pasquéye :  
One dozin.ne d'omes, po l' mwins', èt nin dès djins d' nos djins  
Pèstèlin.n' come dès gades su l' voléye di montéyes.  
C'èsteûve dès consèliers, sènateûrs, députés  
Qu'avin.n' apris – tot s' dit – qu'on cwèfèû au grand keûr  
Travayeut po l'oneûr ! Il è v'lin.n' profiter :

“ C’è-st-adon qu’i l’ faut coude, li frût, quand il èst meûr ! “  
Mès djins, qué difèrince dins nosse pitit payis  
Ètur li ci qui boute èt l’ ronflant qui nos mwin.ne !  
Li p’tit, qu’a dèl consyince, il î trove do plaîji  
Dismètant qu’ lès tchafiauds, i n’ sèmenut qui dèl in.ne.  
On m’a minme raconté, dji n’ sé nin si c’èst l’ vraî,  
Qu’on ‘nn’aureut j’qu’à r’mâqué saquants pèlés dins l’ binde !  
Mins ça n’ mi sbarereut nin, ça n’a qu’on seûl sowaît :  
“l-gn-a qu’ l’onteûs qu’î pièd, faut prinde tot ç’ qui s’ présinte.”  
On-z-ètind co bin dîre : « Lès djins sont disgostés !  
On l’zî vout fé acrwêre qui grâce à leûs vôtadjes  
I vont p’lu r’mète d’alûre tot ç’ qu’ èst disfirloqueté ! »  
Mins à l’ longue, on ‘nn’a s’ sô d’ choûter leûs fôs ramadjes !

Albert Delvaux Mârs’ 2014

Boute-po-rin : bénévolé

Rèclame : affiche publicitaire.

Li minme twale à m’ saurtot : idem, même chose .

Ènn’awè d’ cure : ne pas se soucier...

Fé dès figues : se montrer meilleur, supérieur.

Yèsse di d’néye : jeu de mots : être prodigue/de Denée.

Gangnî aus coûsses : gagner un pari.

Dès djins d’ nos djins : de la classe populaire.